

## **UKIUMI MISSINGERSUUSIORFIUSUMI 2014-IMI KOMMUNINUT ATAATSI- MOORTUMIK TAPIISSUTISSAT PILLUGIT ISUMAQATIGIISSUT**

Kommuninut 2014-imi ataatsimoortumik tapiissutit 1.147.388.000 kr.-inik annertussuseqassapput. Ilanngussaq 1-imi takuneqarsinnaapput ataatsimoortumik tapiissutissat 2013-imut sanilliullugu qanoq allannguuteqartinneqarnersut. Isumaqatigiissummi immikkoortut assigiinngitsut uani ataani allaaserineqarput.

### **1. Akinut akissarsianullu iluarsiiissutit**

2013-imut ataatsimoortumik tapiissutissat pillugit isumaqatigiissummi aallaaviupput 2014-imi ataatsimoortumik tapiissutaasussat 1.141,3 mio. kr.-it. Isumaqatigiissummi 2014-imoortumi ilaapput kommunini inatsisit naapertorlugit ineqarnermut tapiissutinut aammalu siusinaartumik soraarnerussutisianut aningaasartuutit inaarutaasumik akilerneqarnissaat, katillugit 126,3 mio. kr.-inik annertussuseqartut. Kiisalu ataatsimoortumik tapiissutinut aamma ilaapput kuuffiit eqqaaviusut iluarsaanneqarnissaannut aningaasat atorneqartussat 21,5 mio. kr.-it, taassumalu paarlattuanik aningaasanut inatsimmi 6 mio. kr.-inik kommunit aningaasaataannit immikkoortitsisoqarpoq Danmark-imi inissiisarnernut qitiusumik aningaasaliissutinut immikkoortitanut. 2014-imi ataatsimoortumik tapiissutissat pissutsit siuliani eqqartorneqartut isumannaareerlugit 999,4 mio. kr.-inik annertussuseqarput.

Illuatungeriit isumaqatigiissutigivaat akinut akissarsianullu iluarsiiissutit aallaavittut 2014-imi siuliani pissutsinik pineqartunik iluarseereernikkut 999,4 mio. kr.-inik annertussuseqartut 1,50 %-inik iluarsiivigineqassasut, taakkualu 2014-imi 15,0 mio. kr.-inik annertussuseqartut.

### **2. Ineqarnermut 2012-imi tapiissutit iluarsiivigineqarneri**

Ineqarnermut 2012-imi tapiissutinut aningaasartuutit naatsorsuutigisamiit appasinnerusimapput. Illuatungeriit isumaqatigiissutigivaat kommuninut ataatsimoortumik tapiissutit 2014-imi 2.933.000 kr.-inik appaavigineqassasut, 2012-imi atuinermut naatsorsuutit inaarutaasumik naatsorsorneqarnerattut.

### **3. Siusinaarluni 2012-imi soraarnerussutisiat iluarsiivigineqarnerat**

2012-imi siusinaarluni soraarnerussutisianut aningaasartuutit naatsorsuutigisamiit annikinrerungaatsiarsimapput. Illuatungeriit tamanna tunngavigalugu isumaqatigiissutigivaat kommuninut ataatsimoortumik 2014-imi tapiissutit 18.919.000 kr.-inik appaavigineqassasut.

#### **4. Meeqqanut inuusuttuaqqanullu ulloq unnuarlu angerlarsimaffiit – 2014-imut aningaasartuutissanut missingersuusiatic**

Ilaqtariinnermut Inatsisinillu atortitsinnermut Naalackersuisoqarfik KANUKOKA-lu meeqqanut inuusuttuaqqanullu ulloq unnuarlu angerlarsimaffinnut 2014-imut aningaasartuutissanut missingersuutit isumaqatigiissutigaa.

Meeqqanut inuusuttuaqqanullu ulloq unnuarlu angerlarsimaffinnut kommunit ataatsimoortumik 2014-imi aningaasartuutissaat katillugit 145.888.000 kr.-inut missingersuusiorneqarput. 2014-imi ataatsimut aningaasartuutissani ilanngunneqarput 2012-imi atuinikinnerussutaasut 1.084.000 kr.-inik annertussuseqartut. Meeqqanut inuusuttuaqqanullu ulloq unnuarlu angerlarsimaffinnut ingerlatsinnermi aningaasartuutit kommuninit aningaasalersorneqartarput, aningaasartuutillu 50 %-ii kommuninut ataatsimoortumik tapiissutit ilanngaavigineqarnerisigut aningaasalersorneqartarput, 50 %-illu kingulliit kommuninit meeqqanik inuusuttuaqqanillu najugaqartitsinnermut annertussusileriikkanik akiliuteqartitsisarnikkut aningaasalersorneqartarlutik.

Illuatungeriillu tamanna tunngavigalugu isumaqatigiissutigaa 2014-imi siumoortumik akiliutaasusatsat 72.944.000 kr.-inik annertussuseqartut, taakkualu ataatsimoortumik tapiissutit ilanngaavigineqarnerisigut aningaasalersorneqassasut. Tamatuma kinguneraa ataatsimoortumik tapiissutit 558.000 kr.-inik qaffanneqassammata, tamannalu 2012-imi atuinikinnerussutaasunut sanilliullugu isigineqassaaq, aammalu ataatsimoortumik tapiissutit ilanngaavigineqarnerat 2014-imut ilanngunneqartoq, suliaasaqarfimmud tassunga tunngatillugu 2013-imi isumaqatigiissuteqarnermut atatillugu.

Illuatungeriit isumaqatigiissutigaa 100 %-imik annertussusileriikkamik akiliuteqartitsisarnermut ikaarsaarnissamut tunngatillugu qulaajaaneq aaqqiissutissaasinnaasunillu ujarlerneq ingerlatseqqineqassasoq, ilassutitut isumaqatigiissusiornissaq siunertaralugu, taanna 1. januar 2014 atortuulersinnaaqqullugu.

#### **5. Innarluutilinnut angerlarsimaffiit – 2014-imut aningaasartuutissanut missingersuusiatic**

Ilaqtariinnermut Inatsisinillu Atortitsinnermut Naalackersuisoqarfiup KANUKOKA-llu 2014-imut innarluutilinnut angerlarsimaffinnik ingerlatsinnermut aningaasartuutissanut missingersuusiatic isumaqatigiissutigaa.

Innarluutilinnut angerlarsimaffeqarnermut kommunit ataatsimoortumik 2014-imi aningaasartuutissaat 130.484.000 kr.-inut missingersuusiorneqarput. 2014-imi ataatsimut aningaasartuutissanut ilanngunneqassappud 2012-imi atuinikinnerussutaasut 1.918.000 kr.-it. Innarluutilinnut ulloq unnuarlu angerlarsimaffinnik ingerlatsinnermut aningaasartuutit kommuninit aningaasalersorneqassappud, aningaasartuutillu 50 %-ii kommuninut ataatsimoortumik tapiissutit ilanngaavigineqarnerisigut aningaasalersorneqassallutik, 50 %-illu kingulliit kommunit najugaqartitsinnermut annertussusileriikkanik innarluutilinnut najugaqartinneqartunut tunngatillugu akiliuteqartarnerisigut aningaasalersorneqassallutik.

Illuatungeriillu tamanna tunuliaqutaralugu isumaqatigiissutigaaat siumoortumik akiliutaasussat 2014-imi 65.242.000 kr.-inik annertussuseqartut, taakkualu ataatsimoortumik tapiissutissat ilanngaavigineqarnerisigut aningaasalersorneqassallutik. Taamaattumillu ataatsimoortumik tapiissutit 199.000 kr.-inik ilanngaavigineqassappat, taakkualu 2012-imi atuinikinnerussutaasunut sanilliullugit isigineqassapput, aammalu ataatsimoortumik tapiissutit ilanngaavigineqarnissaat, 2014-imumut atatillugu 2013-imi isumaqatigiissuteqarnermi naatsorsuutigineqareersimasunut tunngatillugu.

Illuatungeriit isumaqatigiissutigaaat 100 % -imik annertussusileriikkamik akiliuteqartitsisarnermut ikaarsaarnissamut tunngatillugu qulaajaaneq aaqqiissutissaasinnaasunillu ujarlerneq ingerlatseqqineqassasoq, ilassutitut isumaqatigiissusiornissaq siunertaralugu, taanna 1. januar 2014 atortuulersinnaaqullugu.

#### **6. Danmark-imi inissiisarnernut atatillugu aningaasat qitiusumi immikkoortitat**

Innarluutilinnut atatillugu suliassaqarfiup 2011-imi kommuninut nuunneqarnerani isumaqatigiissutigineqarpoq aningaasanut inatsimmi qitiusumik aningaasaliissutinik immikkoortitsisoqartalisasoq, kommuninut aningaasaqarnikkut tapiissutaasartussanik, innarluutilinnik immikkut akisuunik Danmark-imi inissiisoqartarneranut atatillugu. Aningaasaliissutit immikkoortitat konto-mi pingaarnermi 30.13.07 - mi, Danmark-imi inissiisarnermut atatillugu qitiusumik aningaasaliissutitut inissisimapput.

Aningaasaliissutit immikkoortitat ataatsimoortumik tapiissutit ilanngaavigineqarnerisigut aningaasalersorneqartarput.

2012 – imi aningaasanut inatsimmi konto-mi pingaarnermi 30.13.07-imi aningaasaliissutit 6 mio. kr.-it immikkoortinneqarsimapput, Qitiusumik aningaasaliissutit Danmark-imi inissiisarnernut. Taamaakkaluatorli 2012-imi taamaallaat aningaasaliissutaasunit 3.686.000 kr.-it atorneqarput, taamaattumillu ataatsimoortumik 2014-imumut tapiissutissat 2.314.000 kr.-inik qaffaavigineqassapput, taakkualu 2012-imi atuinikinnerussutaasut assigaaat.

#### **7. Ilaqutariit innarluutilinnik oqilisaassisartut akissarsiassa**

Naalackersuisut kissaatigaat innarluutilinnut oqilisaassisarnermik suliaqartartut ilaqutariit akissarsiiaat ullormut unnuamullu 304,01 kr. – iniit ullormut unnuamullu 1.000 kr.-inut qaffanneqassasoq, 1. januar 2014 atortuulersumik.

Qaffaanikkut Naalackersuisut kissaatigaat akissarsiiaat akiliutaasartup ullutsinnut naleqqunnerulersinneqarnissaa. Qaffaanikkullu aamma Naalackersuisut neriuutigaat ilaqutariit innarluutilinnut oqilisaassinermik suliaqarnissamik kissaateqartut amerlanerulersinnaanerat.

Illuatungeriillu tamanna tunngavigalugu ataatsimoortumik 2014-imumut tapiissutit 700.000 kr. – inik qaffanneqarnissaat isumaqatigiissutigivaat.

**8. Innarluutillit inuusuttut Danmark-imi ineqartinneqartut immikkut ilassutitut tikeraarlutik angalasinnaanerit**

Ullumikkut innarluutillit inuusuttut 16-24 - illu akornanni ukiullit Danmark-imi najugaqartinneqarallartut (ukiumi ataatsimiit ukiut sisamat angullugit) periarfissaqarput siumut utimullu akiliunneqarlutik ukiumut ataasiarlutik Kalaallit Nunaannut angalasinnaanermut.

Naalackersuisut kissaatigaat 1. januar 2014 aallarnerfigalugu inuusuttunut innarluutilinnut taak-kununga periarfissaqartitsisoqalissasoq siumut utimullu akiliunneqarluni ukiumut marloriarluni Kalaallit Nunaannut angalasoqarsinnaanngussasoq.

Illuatungeriit tamanna tunuliaqutaralugu isumaqatigiissutigaat ataatsimoortumik tapiissutit 700.000 kr. – inik qaffanneqassasut 2014 aallarnerfigalugu.

**9. Copydan**

1. januar 2014 aallarnerfigalugu Copydan-imut akiliutit qaffassapput, Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoqarfiup aamma KANUKOKA-p Copydan-imut nutaamik isumaqatigiissuteqarnerisa kingunerisaanik.

Naalackersuisut aamma KANUKOKA isumaqatigiissuteqarneri tunngavigalugit kommunit Copydan-imut akiliutissaat, meeqqat atuarfianni sulianut tunngasuunerusut, aningaasanut inatsimmut ilanngunneqarsimapput. Taamatut aaqqissuussisoqarpoq Copydan-imut akiliuteqartarnermi allaffis-sorneq anikillilerniarlugu, taamaasiornikkullu ataatsimoortumik akiliuteqartoqartalerluni, kommu-nillu akiliutissaat ataatsimoortumik tapiissutit annikillinerisigut aningaasalersorneqarluni.

Copydan-imut nutaamik isumaqatigiissuteqarnerup kingunerisaanik suliassaqarfimmi kommunit aningaasartuutaat qaffapput.

Illuatungeriillu tamanna tunuliaqutaralugu isumaqatigiipput ataatsimoortumik tapiissutit 2014-imi 289.000 kr. – inik, 2015-imi 611.000 kr. –inik aamma 2016 –imi 932.000 kr.-inik apparneqassasut.

**10. Ernianik ilanngaateqartarnerup tamakkiisup atortuulerseqqinneqarnera**

1. januar 2013 aallarnerfigalugu erniat ilanngaatigineqarsinnaanerata nalinga annikillineqarpoq, taamaasillunilu siunissami taamaallaat isertitanit akileraarutissanit ernianut aningaasartuutit 90 % -ii ilanngaatigineqarsinnaalerlutik.

Naalackersuisut Inatsisartut 2013-ip ukiaani ataatsimiinnissaannut inatsisissatut siunnersuuteqar-niarput ernianut aningaasartuutit ukioq isertitaqarfiusoq 2014 aallarnerfigalugu tamakkiisumik ilanngaatigineqarsinnaanngorteqqinniarlugit.

Illuatungeriit tamanna tunuliaqutaralugu isumaqatigiissutigaat ataatsimoortumik tapiissutit 2014-imiit qaffanneqassasut 9.180.000 kr. –inik. Qaffaat ataatsimoortumik tapiissutit 2013-imi appaavineqarnerisa annertoqatigaa.

### **11. 2012-imi akileraartarnikkut allannguinerit atortuulersikkiartuaarneri**

Inatsisartut 2012-imi ukiakkut ataatsimiinnerminni akileraartarnikkut allannguinnissat akuersisutigaat. Akileraartarnikkut allannguinerit ilaatigut sinneqartoorutinut ingerlaannartumillu nalikilliisarnernut malittarisassanut tunngasuupput, aningaasaqarnikkullu kingunerisassai ukiut arlaqartut ingerlaneranni atortuulersikkiortuaarneqassallutik.

Illuatungeriillu tamanna tunuliaqutaralugu isumaqatigiissutigaat ataatsimoortumik tapiissutit 1.876.000 kr. –inik 2017-imiit qaffanneqassasut.

### **12. Annertusisamik immikkut atuartitsineq**

Utertitsisarnermut annertussusiliinerit Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoqarfiup aamma Kalaallit Nunaanni Kommunit Kattuffiata akornanni isumaqatigiissutigineqarput. Aningaasaliissutaasartut annertussusiat 2013-imi aamma 2014-imi akissarsiassanut missingersuusiat naapertorlugit annertussusilerneqarnikuupput. Akissarsiat 2013-imut annertussusissaat 2,08 % -imik naleqqussarneqarput, 2012-imi akissarsiat atorneqartut annertussusiannut sanilliullugu, aammalu 2014-imi akissarsiat annertussusissaat 1,50 % -imik naleqqussarneqarlutik, 2013-imi akissarsiassasussatut missingersuutigineqartunut sanilliullugit. Illuatungeriit isumaqatigiissutigaat annertusisamik immikkut ittumik atuartitsinernut aningaasartuutinut utertitsissutaasartut annertussusissaat 2014 – imi 567,34 kr. – iussasoq nal. ak. atuartitsiffiusunut 60 minuttsinik sivissussuseqartunut.

### **13. Meeqqat atuarfiat – nunaqarfinni nal. ak. atuartitsiffiusut**

Inatsisartut 2012 –imi ukiakkut ataatsimiinnerminni Meeqqat Atuarfiat pillugu Inatsisartut inatsisaat nr 15, 3. december 2012 –imeersoq akuersissutigaat.

KANUKOKA-p nalilerpaa meeqqat atuarfiat pillugu Inatsisartut inatsisaat nutaaq aqutigalugu nunaqarfinni nal. ak. atuartitsiffiusussanut atatillugu immikkut akuersissuteqarsinnaanermut periarfissat allanngortinneqartut.

Illuatungeriit isumaqatigiissutigaat suleqatigiissitamik pilersitsisoqassasoq, ataatsimiititaliallu mississussagai nal. ak. atuartitsiffiusartut nunatsinni sumiiffinni ineriartornermut naapertuunnerusumik aaqquissuunneqarsinnaanersut, IT-mik atuinerup atuartitsinermi periarfissai aammalu atuartut ilinniartitsisunik ilinniarsimasunik atuartitsisoqarlutik sapinngisamik annertunerpaamik atuartinneqarsinnaanerannut tunngatillugu kissaataasut.

Suleqatigiissitaaq KANUKOKA-miit, Aningaasaqarnermut Nunamilu Namminermi Pissutsinut Naalackersuisoqarfimmiit kiisalu Ilinniartitaanermut, Ilageeqarnermut, Kultureqarnermut Naligiis-

sitaanermullu Naalackersuisoqarfimmiit sinniisoqassaaq. IMAK suliap ingerlanneqarnerani akulerunneqarumaarpoq.

#### **14. Kalaallit Nunaanni oqimaaqatigiissumik ineriartornerup isumannaarneqarnissaa**

Illuatungeriit kissaatigaat Kalaallit Nunaanni oqimaaqatigiissaakkamik ineriartortitsisoqassasoq. Naalackersuisut qitiutippaat kommunini sisamaasuni tamani annertusaanissamut ineriartornissamullu periarfissaqarnissaa.

2014 – imut aningaasanut inatsisissatut siunnersuummi, Naalackersuisut aggesti qaammat saqqummiunniagaani, Nuup avataani sanaartornikkut ilinniartitaanikkullu suliniutaasut nukittorsavigineqarnissaat qitiutinneqassaaq. Suliffissanik ilinniarfissanillu pilersitsiortornerit aalajangiisuumik pingaaruteqarput annertusaanissamut ineriartortitsinissamullu.

Ilutigisaanillu Naalackersuisut kissaatigaat kommunillu oqaloqatigiittoqassasoq isumannaarniarlugu annertusaanissap ineriartortitsinissallu kommunini sisamaasuni tamani ingerlanneqarnissaa.

Oqallinneq killilersugaanngitsumik ingerlanneqassaaq, tassanilu ilaatigut eqqumaffigineqassapput innuttaasut nunassittarnerat aammalu kommunit akornanni aningaasaqarnikkut naligiissarineq, nassuiaasiaq aqqutigalugu ammaavigineqarmat Namminersorlutik Oqartussat kommunillu akornanni suleqatigiinnermut isumaqatigiissutip nutarteriffigineqarnissaa.

#### **15. Pissutsit allat**

Inatsisissatut siunnersuutit Inatsisartuni suliarineqarsimangitsut aningaasaqarnikkut kingunerissaat illuatungeriinnit kingornatigut isumaqatigiinniutigineqarsinnaapput.

Ataatsimoortumik tapiissutissanut isumaqatigiissut una Namminersorlutik Oqartussat kommunillu akornanni isumaqatigiissutigineqartoq aningaasaliissutinik akuersissuteqartartut akuersinissaat apeqquaatillugu isumaqatigiissutigineqarpoq.

Nuuk, ulloq 3. juli 2013.



---

Vittus Qujaukitsoq  
Aningaasaqarnermut Nunamullu  
Namminermut Naalackersuisoq



---

Martha Abelsen  
Kalaallit Nunaanni kommunit  
kattuffiata siulittaasua

NAMMINERSORLUTIK OQARTUSSAT  
KALAALLIT NUNAANNI KOMMUNIT KATTUFFIAT

**Ilanngussaq 1. Aningaasartuutissanut missingersuusiorfiusumi 2014-imi kommuninut ataatsimoortumik tapiissutissanut isumaqatigiissummi immikkoortut assigiinngitsut**

	Isumaqatigiissut	--- mio. kr. ---		
		2014	2015	2016
Aallaaviit 2013-imi isumaqatigiissut tunngavigalugu	1.141.284.000	1.144,1	1.146,4	1.146,4
1. Akinut akissarsianullu iluarsiiissutit	14.992.000	15,0	15,1	15,1
2. Ineqarnermut tapiissutinut iluarsiiissutit 2012	-2.933.000	0,0	0,0	0,0
3. Siusinaartumik soraarnerussutisianut iluars. 2012	-18.919.000	0,0	0,0	0,0
4. DK-mi inissiisarnermut qitiusumik immikk.	2.314.000	0,0	0,0	0,0
5. Meeqqanut inuusuttuaqqanullu ulloq unnuarlu angerlarsimaffiit	558.000	0,0	0,0	0,0
6. Innarluutillit angerlarsimaffii	-199.000	-1,2	-1,2	-1,2
7. Ilaqutariit innarluutilinnik oqilisaassisartut akis-sarsiassa	700.000	0,7	0,7	0,7
8. Innarluutillit DK-mi najugaqartut tikeraartarnerat	700.000	0,7	0,7	0,7
9. Copydan	-289.000	-0,6	-0,9	-0,9
10. Ernianik ilanngaateqartarnerup tamakkiisup atortuulerseqinneqarnera	9.180.000	9,2	9,2	9,2
11. Akileraartarmikkut allannguinerit 2012 atortuuler-sikkiartuaarneri	0	0,0	0,0	1,9
<b>Kommuninut ataatsimoortumik tapiissutit nutaat</b>	<b>1.147.388.000</b>	<b>1.167,9</b>	<b>1.169,9</b>	<b>1.171,8</b>